

վարչական տույժ նշանակելու մասին

«17» նոյեմբերի 2021թ.

ք.Երևան

ՀՀ պետական եկամուտների կոմիտեի իրավաբանական վարչության պետ Ա.Մնացականյանս, քննելով ժաննա Գևորգյանի վերաբերյալ նյութերը.

Պ Ա Ր Զ Ե Ց Ի՝

2021 թվականի օգոստոսի 14-ին ՀՀ ԱՄՕ ՓԲԸ Զվարթնոց օդանավակայանի ուղևորային համալիրի ժամանման սրահի մաքսային հսկողության գոտում անձնական զննման է ենթարկվել Ստամբուլ-Մինսկ-Երևան B2 733 չվերթով ՀՀ ժամանած ժաննա Գևորգյանը, որի արդյունքում վերջինիս մոտ հայտնաբերվել է մաքսային հսկողությունից թաքցված 1032 գրամ ընդհանուր քաշով սպիտակ և դեղին մետաղանման զարդեր:

Փաստի առթիվ ժաննա Գևորգյանի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ վերոնշյալ ապրանքները, որպես մաքսային կանոնների խախտման անմիջական օբյեկտ, վերցվել են:

Վարույթի շրջանակներում ժաննա Գևորգյանը բացատրություն է տվել այն մասին, որ զարդերը պահել էր հագուստի մեջ, քանի որ վախենում էր դրանք կորցնել, հայտնել է, որ այդ զարդերը իրեն էր փոխանցել իր ընկերուհի Ալինան, ով ապրում է Թուրքիայում, որպեսզի ՀՀ ում փոխանցի այլ անձի:

Վարչական վարույթի շրջանակներում քաղաքացի Լիանա Կարապետյանը դիմումներով հայտնել է որ իրավախախտման անմիջական օբյեկտ հանդիսացող զարդերը պատկանում են իրեն, ներկայացրել է հաշիվ ապրանքագիր և խնդրել դրանք վերադարձնել: Ի պատասխան վերոնշյալ դիմումների 25.09.2021թ., թիվ 11/11-3/60228-2021 գրությամբ հայտնվել է, որ զարդերը Լիանա Կարապետյանին վերադարձնելու հարցին հնարավոր կլինի անդրադառնալ մաքսային կանոնների խախտման վարույթի ավարտից հետո:

Վարույթի շրջանակներում Լիանա Կարապետյանը բացատրություն է տվել այն մասին, որ ունենալով հավաքած գումար խնդրել է իր մայրիկին՝ ով բնակվում է Թուրքիայում, որպեսզի իտալական ծագման զարդեր գնի և ուղարկի ՀՀ, վերջինս գնացել է ոսկյա զարդերի խանութ հեռախոսը փախանցել է խանութի աշխատակցուհի Ալինային և Լիանան հեռախոսով, պատվիրել է զարդերը, այնուհետև աշխատակցուհի Ալինայի ծանոթ ժաննա Գևորգյանի միջոցով զարդերը ուղարկել են ՀՀ, ինչից հետո լրատվամիջոցներով իմացել է, որ ժաննա Գևորգյանի մոտ գտնվող զարդերը մաքսային մարմինների կողմից վերցվել են:

Մաքսային հսկողությունից թաքցված ապրանքների ապրանքների շուկայական արժեքը պարզելու նպատակով նշանակվել է նյութագիտական և ապրանքագիտական փորձաքննություն, որի կատարումը հանձնարարվել է ՀՀ «Փորձագիտական կենտրոն» պետական ոչ առևտրային կազմակերպությանը:

ՀՀ «Փորձագիտական կենտրոն» պետական ոչ առևտրային կազմակերպության փորձագետի 01.10.2021թ. թիվ 17882104 եզրակացության համաձայն՝ փորձաքննությանը ներկայացված զարդերի միջին շուկայական արժեքը 2021 թվականի օգոստոսի 14-ի դրությամբ կարող էր կազմել 20558000 ՀՀ դրամ:

Պարզելու համար, թե որքան է կազմել չհայտարարագրված ապրանքների մաքսային արժեքը և վճարման ենթակա մաքսային վճարների չափը, հարցում է կատարվել ՊԵԿ մաքսային հսկողության վարչություն, որտեղից ստացված 05.10.2021թ. թիվ Ն/8-1/178188-2021 պատասխան գրության համաձայն՝ 14.08.2021թ. դրությամբ ՀՀ ներմուծված զարդերի մաքսային արժեքը

կազմել է 15573775 ՀՀ դրամ (ԱԱՀ 3426230 ՀՀ դրամ, մաքսատուրք 1557377 ՀՀ դրամ): Նշվել է նաև, որ ոսկյա զարդերի ներմուծման դեպքում առաջանում է ոչ սակագնային կարգավորման միջոցների կիրառում:

Հաշվի առնելով, որ մաքսային հսկողությունից թաքցնելով ներմուծված զարդերի պակաս հաշվարկված մաքսային վճարները գերազանցել են «Նվազագույն աշխատավարձի մասին» ՀՀ օրենքի 3-րդ հոդվածով նախատեսված չորսհազարապատիկի չափը, այսինքն՝ առկա են եղել ՀՀ քրեական օրենսգրքի 205-րդ հոդվածի 1-ին մասով նախատեսված հանցագործության հատկանիշներ, ուստի, ղեկավարվելով «Վարչական իրավախախտումների վերաբերյալ» ՀՀ օրենսգրքի 253-րդ հոդվածով, ժաննա Գևորգյանի վերաբերյալ նյութերը ուղարկվել են ՀՀ ՊԵԿ հետաքննության և օպերատիվ հետախուզության վարչություն:

Նյութերի նախապատրաստման ընթացքում ժաննա Գևորգյանը պնդել է իր բացատրությունը և հավելել, որ ոսկյա զարդերը իրեն է փոխանցել Թուրքիայում աշխատող ոմն Ալինայի ծանոթը՝ վերջինիս դստերը ՀՀ ում փոխանցելու նպատակով:

Նյութերի նախապատրաստման ընթացքում Լիանա Կարապետյանը պնդել է իր բացատրությունը և հավելել որ ՀՀ ներմուծելուց հետո տեղեկացել է որ ոսկյա զարդերի ծագման երկիրը հանդիսանում է Թուրքիան:

2021 թվականի հոկտեմբերի 18-ին ժաննա Գևորգյանի վերաբերյալ նախապատրաստված նյութերով կայացվել է քրեական գործի հարուցումը մերժելու մասին որոշումը, իսկ նախապատրաստված նյութերն ուղարկվել են ՀՀ ՊԵԿ իրավաբանական վարչություն:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

Ժաննա Գևորգյանը ծանուցվել է գործի քննության վայրի և ժամանակի մասին, սակայն վերջինս չի ներկայացել: Գործի քննությունը կատարվել է նրա բացակայությամբ՝ հիմք ընդունելով ՀՀ մաքսային օրենսգրքի 219-րդ հոդվածի 2-րդ մասը:

Այսպիսով, նյութերով պարզվել է, որ 2021 թվականի օգոստոսի 14-ին Ժաննա Գևորգյանը, մաքսային հսկողությունից թաքցնելով՝ հագուստի մեջ պահելով ՀՀ մաքսային սահմանով տեղափոխել է 15573775 ՀՀ դրամ մաքսային արժեքով ոսկյա զարդեր, այսինքն՝ Ժաննա Գևորգյանը թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, Ժաննա Գևորգյանի, Լիանա Կարապետյանի բացատրություններով, փորձագետի 01.10.2021թ. թիվ 17882104 եզրակացությամբ, ՀՀ ՊԵԿ մաքսային հսկողության վարչության 05.10.2021թ. թիվ Ն/8-1/178188-2021 գրությամբ և 18.10.2021թ. քրեական գործի հարուցումը մերժելու մասին որոշմամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ հոդվածով, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Ժաննա Գևորգյանին (ծնված՝ 28.04.1961թ., բնակվող՝ ՀՀ, ք. Երևան, Արշակունյաց պ 2 42/1 բն 12, անձնագիր AT0660039) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել՝ 15573775 ՀՀ դրամի չափով:

2. ՀՀ մաքսային օրենսգրքի 221-րդ հոդվածի համաձայն՝ որոշումն ուժի մեջ է մտնում կայացման պահից և Վարչարարության հիմունքների և վարչական վարույթի մասին ՀՀ օրենքի 71 հոդվածի համաձայն՝ 2 ամսվա ընթացքում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքի 72-րդ հոդվածի 1-ին մասին 1-ին կետի համաձայն՝ 2 ամսվա ընթացքում ՀՀ վարչական դատարան:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



Ա. ՄՆԱՑԱԿԱՆՅԱՆ